

Wednesday, February 12, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

VC/LC ELECTION

Mizorama Village Council leh Local Council inthlan vote thlak chu tukin dar 7 atang khan boruak muanawm tak hnuaiah vote thlak tan a ni a, tun dinhmunah ruahmanna engkim engkim tluang taka kalpui ni a thudawn a ni.

Election Commissioner Dr. H. Lalthlanglana chuan Mizoram hmun hrang hranga Village Council leh Aizawl leh Lunglei-a Local Council inthlan vote thlak chu zing 7 atanga tlai dar 4 ah neih a nih tur thu a sawi a. Vote hi zan dar 7 atanga chhiar tur niin polling station tina RO ten result an puang dawn a ti.

Dr. H. Lalthlanglana chuan Local council leh Village council inthlanna lo awm turah mipuiten vote an thlak ngei theih nan ruahmanna hrang hrang siam a nih thu sawiin vote nei zawng zawngte vote thlak ngei turin a sawm a. Democracy chu mi zawng zawng mi lian leh mi te inang tlanga sorkar an siam theihna awm chhun ani tih sawiin vote thlak vek turin mipuite a sawm a ni. (BYTE...Dr H. Lalthlanglana)

SEC thuchhuah tarlan danin Lunglei District-a Lalnutui ah candidate a boral avangin ni 13 hian vote thlak a ni dawn a. Lawipu Veng-ah nizan khan Local Council candidate congress party a boral avangin nimin khan Lawipui veng inthlan hun hi sawn niin, ni 14 (zirtawpni) ah hemi bial ah hian inthlanna neih a ni ang.

Autonomous District Council awmna tiam lovin, Mizorama district 9-ah hian VC 544 awmin bial 2,416 a awm a. Bial 1,803 te hi tu pawhin chuh theih a nih laiin bial 613 hi hmeichhe tana hauh bik a ni. Bial 2,416 chuh tura hming pelut hi mi 6,829 awmin candidate 5,178 te chuan tu pawhin a a chuh theih bial an chuh a, hmeichhe tana hauh bik bial chuhtu hi mi 1,651 an ni.

Aizawl Municipal Corporation (AMC) huam chhungah hian LC 87 awmin bial/member 575 a awm a, bial 418 chu duh duh chuh theih niin bial 157 chu hmeichhe tana hauh bik a ni. AMC huam chhunga LC inthlan chuhtu hi general seat-ah mi 1,211 leh hmeichhe tana hauh bik chuhtu mi 448 an awm a ni.

Lunglei Municipal Council (LMC) huam chhunga LC 24-ah hian bial 148 awmin mitin chuh theih bial 110 leh hmeichhe tana hauh bik bial 38 a awm a. Mitin chuh theih bialah candidate 309 awmin hmeichhe bial bik chuhtu 108 an awm bawk a. LMC hnuaia LC te hi an inthlan hmasakna ber tur a ni.



POL PARTY LEADERS

Mizorama Village Council leh Local Council inthlanah tukin khan Political party hrang hrang hruaituten vote an thlak a, tun dinhmunah party hrang hrang hotute hian vote an thlak kima ngaih a ni.

Chief Minister Pu Lalduhoma chuan an veng Chawlhmun Polling Station ah a thlak a, chak ngei an inring tih sawiin inthlan sawn hma chuan nghawng lian lutuk a neih a rinloh thu a sawi a, hun chep tak karah State Election Commission inbuatsaihna felfai atih thu sawiin vote thlak pawh an that a beisei thu sawiin venhimna hna thawktute chungah leh khua leh tui tha

an nihzia tilanga vote thlaktu zawng zawng te chungah lawmthu a sawi baw k a ni.

MNF President Pu Zoramthanga chuan Ramhlun Venglai Polling Station ah vote a thlak a, inthlanna felfai tak tluang taka neih anih a beisei thu a sawi a, MNF in seat tam tham tak lak an beisei tih sawiin rorellai ZPM chu hun reilote an sawrkar hnuah mipuiin an rorelna hnuaia kum hrehawm anti tih sawiin opposition lamah awm mahse MNF chuan seat tam tak an lak a ring a ti a, VC term pawt tawia inthlan a ngai chu thil fello a awm tih sawiin hun lo awm zelah sawrkar la awm tur ten VC term tih danglam a hlauhthawnawm tih sawiin nakin zelah thil pawt zawk ala thleng thei tih a sawi.

MPCC President Pu Lal Thanzara chuan Zarkawt Polling Station ah vote thlak in mipui tam thei ang ber vote thlak turin a ngen thu a sawi a, ZPM sawrkar chu an intiam angin an awmlo tih sawiin Congress sawrkar laia ram rohlu alo siam tawh hralh turin hma a la thin a ti a, an intiam anga an awmluh dan hre reng chungah vote thlak turin Mizo mipuite a ngen tih a sawi.



ARMS HAUL IN SOUTH MIZORAM

Village Council leh Local Council inthlan kaihhawiha venhimna kenkawh kawnga beihpui thlakna kal zelah Lunglei SP Jerome Lalmuankima hma laknain District Special Branch te chuan Dan kalha tawlhruk Silai leh a mu tam tham tak an man.

Lunglei District Special Branch in an man hi Thenzawl atanga lokal lirthai pakhat atangin a ni a, Lunglei Bazar area ah man niin dan kalha tawlhruk an man te hi AK 47 pahnih, M4 Carbine panga leh a magazine 20 bakah silaimu thahnem tak leh Pawisa fai Rs. 49,550/- leh ID cards, ATM Cards, Sim Card and Mobile phone panga an man a, hemi kaihhnawihah hian Roni Chakma (kum 45) Tripura lam mi leh Anirban Chakma (kum 34) Lawngtlai District ami leh Ribeng (kum 24) Lunglei ami te chu man an ni a, Tun tuma Silai leh a mu man te hi Mizoram ah vawi khat a Silai leh a mu man tam ber tum te zing ami ni a hriat a ni.



LADC

Nikum May ni 7 atanga Lai Autonomous District Council a Congress leh MNF Party Sorkar intawm chu vawiin khan Chief Executive Member Pu C.Lalmuanthanga’n banna Governor hnen ah LADC Chairman Pu VL Hmuaka kaltlanga a thehluh vangin, tun dinhmun ah LADC Sokar dinglai chu a tlu.

